


# PLANI STRATEGJIK PËR AVOKIM

Nëntor 2023 – Tetor 2025

Grupi Hëna



**Autorsia: HANDIKOS**

 *Ky publikim është financuar nga Qeveria Suedeze me mbështetje të Save the Children. Përgjegjësia për përmbajtjen qëndron tek zhvilluesi i saj. Qeveria Suedeze apo Save the Children jo domosdoshmërisht i ndan pikëpamjet dhe interpretimet e shprehura.*

## Prapavija

Fëmijët me aftësi të kufizuara janë grup i rëndësishëm i shoqërisë së Kosovës, të cilët duhet të mbrohen, mbështeten dhe integrohen në mënyrë të barabartë në shoqëri. Ky është detyrim që del nga legjislacioni në fuqi në Republikën e Kosovës, për t'u siguruar që ata të mos lihen të izoluar dhe të përjashtuar nga shoqëria. Kjo ndodh shpesh për shkak të mungesës së sensibilizimit dhe informacionit të mjaftueshëm në lidhje me nevojat dhe potencialet e tyre. Është e rëndësishme të kemi parasysh se çdo fëmijë, pavarësisht potencialeve të tij, ka të drejtë të jetë i lumtur, dhe i përfshirë në menyre aktive në shoqëri. Një nga sfidat kryesore me të cilat përballen fëmijët me aftësi të kufizuara në Kosovë është mungesa e infrastrukturës dhe burimeve të nevojshme për mbështetjen e tyre. Shpesh herë, shkollat dhe ambientet e tjera ku ofrohet edukim dhe arsimim, nuk janë të përshtatshme për fëmijët me aftësi të kufizuara, duke u vështirësuar atyre qasjen në arsim. Për më tepër, ekziston mungesë e burimeve, si mësuesit dhe profesionistët tjerë që punojnë me këtë grup të fëmijëve. Poashtu, fëmijëve me aftësi të kufizuara nuk u ofrohen asistentë personalë, për t'i ndihmuar ata në jetën e përditshme.

Kjo situatë i vë fëmijët me aftësi të kufizuara në një pozitë të vështirë dhe bën që ata të jenë të privuar nga shumë mundësi, të cilat i gëzojnë fëmijët e tjerë. Përmirësimi i infrastrukturës, trajnimi i pedagogëve dhe ofrimin e asistencës personale janë thelbësore për të siguruar që këta fëmijë të kenë mundësinë e një arsimimi dhe zhvillimi të plotë në shoqëri.

Gjithashtu, është e rëndësishme të investohet në trajnimin e stafit arsimor dhe profesionistëve të tjerë që punojnë me fëmijë. Ata duhet të kenë njohuri të mjaftueshme për nevojat e fëmijëve me aftësi të kufizuara dhe të jenë të aftë të përdorin metoda dhe teknika të përshtatshme për të përmbushur nevojat e tyre.

### 1. Përmbledhja

Strategjia e avokimit për të drejtat e fëmijëve me aftësi të kufizuara është zhvilluar nga grupi "Hëna", i cili përbëhet nga anëtarë nga komuna të ndryshme të Kosovës. Strategjia

fillon me një vizion të qartë dhe një mision të fuqishëm. Në një Kosovë ku fëmijët dhe të rinjtë me aftësi të kufizuara shpesh ndjehen të izoluar dhe të përjashtuar, ajo ofron një vizion frymëzues: ata duhen të trajtohen si qytetarë të barabartë në shoqëri. Ajo, po ashtu ofron një mision të qartë ku Grupi Hëna do të avokojë për të drejtat e këtyre fëmijëve dhe të rinjve.

Si qëllim, grupi i ka caktuar vetes respektimin e të drejtave të këtij grupi të veçantë të fëmijëve. Arritja e këtij qëllimi do të bëhet përmes katër objektivave specifike.

- 1. Rritja e pjesëmarrjes e fëmijëve dhe të rinjve me aftësi të kufizuara në jetën publike.**
- 2. Rritja e përkrahjes së institucioneve qeverisëse për fëmijët dhe të rinjtë me aftësi të kufizuara.**
- 3. Ngritja e vetëdijes së shoqërisë lidhur me fëmijët dhe të rinjtë me aftësi të kufizuara.**
- 4. Sigurimi i gjithëpërfshirjes në klasa të rregullta për fëmijët dhe të rinjtë me aftësi të kufizuara.**

Së pari, synojnë rritjen e pjesëmarrjes së fëmijëve dhe të rinjve me aftësi të kufizuara në jetën publike. Kjo përfshin lehtësimin e qasjes së tyre në mjedise publike, si rrugë dhe objekte të qasshme. Përveç kësaj, ata do të kërkojnë edhe pajisjen e sallave sportive me mjete të përshtatshme për fëmijë me aftësi të kufizuara dhe të organizohen aktivitete artistike që i inkurajojnë ata të marrin pjesë, si për shembull futboll në tavolinë, lojëra shahu, shfaqje teatrale, vizatime në sheshe publike, si dhe aktivitete tjera që do të identifikohen së bashku me secilën komunë.

Së dyti, strategjia fokusohet në rritjen e përkrahjes së institucioneve qeverisëse në nivel qendror dhe lokal për këtë grup fëmijësh dhe të rinjsh. Kjo përfshin gjithashtu ndërmarrjen e masave për përmirësimin e infrastrukturës shkollore, si dhe përshtatjen e mësimin dhe kurrikulave për të përmirësuar qasjen dhe shkëmbimin e njohurive për këtë grup të veçantë të nxënësve. Kjo objektivë përfshin, po ashtu, rritjen e numrit të mësuesve mbështetës, sigurimin e asistentëve personalë, dhe rritjen e numrit të sesioneve psikologjike në shkolla për të ndihmuar fëmijët dhe të rinjtë me aftësi të kufizuara të arrijnë potencialin e tyre të plotë.

Një aspekt tjetër i rëndësishëm i strategjisë është promovimi i ndërgjegjësimit të shoqërisë në lidhje me nevojat dhe mundësitë e fëmijëve dhe të rinjve me aftësi të

kufizuara, duke parandaluar diskriminimin dhe duke inkurajuar përfshirjen e tyre në të gjitha sferat e jetës shoqërore dhe arsimore. Këto masa janë të rëndësishme për të siguruar që çdo individ të ketë mundësinë për të zhvilluar potencialin e tyre të plotë dhe për të kontribuar në shoqërinë në të cilën jetojnë.

Sigurimi i gjithëpërfshirjes së fëmijëve dhe të rinjve me aftësi të kufizuara në klasa të rregullta është një hap i rëndësishëm drejt barazisë dhe mundësisë për të gjithë femijet. Zhvillimi i trajnimeve për mësuesit dhe drejtorët është hap kyç për t'u siguruar që ata kanë njohuritë dhe mjetet e nevojshme për të bërë klasat më të përshtatshme për nxënësit me aftësi të kufizuara. Kjo përfshin metodologji të mësimit dhe menaxhimin e klasës që do të përmirësojë përvojën e këtyre femijeve.

Ky plan strategjik është një udhërrëfyes që drejton kah një e ardhme më të ndriçuar dhe më të drejtë për fëmijët dhe të rinjtë me aftësi të kufizuara në Kosovë. Anëtarët e Grupit Hëna janë të vetëdijshëm se ky është një rrugëtim i vështirë, por me një vizion të qartë dhe një përkushtim të patundur, ata do të arrijnë ndryshime në shoqëri, duke garantuar se të drejtat e fëmijëve me aftësi të kufizuara, të cilat janë të garantuara me ligj, respektohen dhe mbrohen.

## 2. Vlerat e Grupit Hëna

### a. Vizioni

Fëmijët dhe të rinjtë me aftësi të kufizuara trajtohen si qytetarë të barabartë në shoqëri.

### b. Misioni

Avokim për të drejtat e fëmijëve dhe të rinjve me aftësi të kufizuara.

### c. Qëllimi

Të respektohen të drejtat e fëmijëve dhe të rinjve me aftësi të kufizuara.

### d. Objektivat specifike dhe rezultatet

1. Rritja e pjesëmarrjes së fëmijëve dhe të rinjve me aftësi të kufizuara në jetën publike.

- 1.1. Është lehtësuar qasja për fëmijët dhe të rinjtë me aftësi të kufizuara në rrugë dhe në objekte publike.
- 1.2. Janë rregulluar dhe pajisur sallat sportive me mjete adekuate për fëmijët dhe të rinjtë me aftësi të kufizuara.
- 1.3. Janë organizuar aktivitete artistike për dhe me fëmijë dhe të rinj me aftësi të kufizuara.
  
2. Rritja e përkrahjes së institucioneve qeverisëse për fëmijët dhe të rinjtë me aftësi të kufizuara.
  - 2.1. Është rritur numri i mësuesve mbështetës në shkolla.
  - 2.2. Janë siguruar asistentë personalë për fëmijët dhe të rinjtë me aftësi të kufizuara.
  - 2.3. Është rritur numri i psikologëve në shkolla dhe numri i seancave psikologjike për fëmijë dhe të rinj me aftësi të kufizuara.
  - 2.4. Është rritur numri i terapistëve të specializuar për punë me fëmijë me aftësi të kufizuara nëpër Qendra të Mjekësisë Familjare.
  
3. Ngritja e vetëdijes së shoqërisë lidhur me fëmijët dhe të rinjtë me aftësi të kufizuara.
  - 3.1. Është rritur numri i aktiviteteve publike të organizuara nga vetë fëmijët dhe të rinjtë me aftësi të kufizuara.
  - 3.2. Është rritur numri i publikimeve në mediat sociale, përfshirë facebook, instagram, tiktok, snapchat, pinterest.
  - 3.3. Është rritur kontakti me institucionet publike për fuqizimin e fëmijëve dhe të rinjve me aftësi të kufizuara.
  
4. Sigurimi i gjithëpërfshirjes në klasa të rregullta për fëmijët dhe të rinjtë me aftësi të kufizuara.
  - 4.1. Janë mbajtur trajnime me personelin arsimorë dhe drejtorë rreth aftësisë së kufizuar.
  - 4.2. Janë krijuar dhe funksionalizuar Ekipet Vlerësuese Pedagogjike nëpër komunat e synuara.





























